

A Is K'anej Dios Bay Cham

Habac

Max yal cham Habac yuj tzet man tojolalok

- 1** ¹ A ton jun k'anej ti' max yal Jehová ayin, ayin Habac in ti', is chekbej.
- ² Max wal in ba bay Jehová: Mamin Jehová, ¿bak'in wal ok in abej? Ilab tol xiwil wal chi el waw ayach yin in k'anon a colwal. ¿Tom manc'al wal ok ach jayoc colwaj jin on? ¿tom jantak wal chi aj waw ayach yuj jantak yobtakil co xol on ti'?
- ³ ¿Tzet xan wal chak' wil jantak yailal c'al yobtakil ti'? Caw wal ay yaxc'ayinakil c'al uchlejbail winlak. Masanilxac'al bay ay owal c'al teyelejbail.
- ⁴ C'amxa ley, c'amxac'al chi beyc'ulnelay is k'anej eb anima yin watx'il, axa eb unem yobtakil chi ukten ec' eb watx'to is nabal. Chi q'uex eb tojolal yin yobal, quin chi.

Paktzebal yuj Jehová

- ⁵ Max tak'wi Jehová: Chi cam wal e yilon juntzan nacionlak oyanxa oc e yinlak ti'. Chi cam e yilon xin, cax xiwokab aj e c'ul yuj. Mayal in na' tzet wal ok wun yul e tiempoal ti', palta man ok e yaoc yin e c'ul yet ok al-lay ayex.
- ⁶ Ti wal ok witek eb caldeo yin owal; a juntzan anima tu', junelnej c'am yabenc'ulal eb. Asan owal chi yochej eb, chi ec' xuyuyok eb bay masanil yulyibank'inal, yuj yion can eb tx'otx' tx'otx' tol mantac'a yetok eb.
- ⁷ A eb tu', caw wal ay is may eb. Caw ay xiwc'ulal eb anima yuj eb. Caw wal chi mimanej ba eb, asan is ley eb yul yet chi yak' k'anabaxok.
- ⁸ Yelxac'al jelan bey chej eb yintak no tz'ib coj. Yelxac'al ec'ban yowal no' yintak no ok chi ec' ak'balil. C'amxa yalbanil bisil is chej eb tu', cax najattac'al ay chi toj jucnajok, axca wal toj lemnaj no tx'acbaj mitx'on junok is chibej.

- 9 Masanil chi yak' lajwok el eb bay chi tojc'al eb, cax chi aj can xiwc'ulalil yuj jantak tzet chi yun eb. Yelxac'al miman bisil anima chi yitok eb preso, axca yarenail a' mar.
- 10 A eb tu', chi buchwaj oc eb yin eb rey, c'al yin eb anima tol mimek yelapnok yaloni. Toc'al chi tzewi oc eb yin conob tol ay is murallail. Chi watz'nej aj bulan eb tx'otx' yin muralla tu', cax chi ayc'ay conob yuj eb.
- 11 Lajwi tu', cax chi tojc'al eb satak, axca wal owal cak'ek'. Chi oc is mul eb in satak, yujtol a yip eb ayoc is diosalok yaloni, xi Jehová.

Max yalon pax cham Habac junelxa

- 12 Max walon bay Cham: Mamin Jehová, tokwal c'am ach ec' yin junelnej. Ach in Diosal, asanxanej ach ocok. Man ok on cam yin junelnej, ach co Colomal. Ach max ak' ipejal bay eb caldeo yuj aon oc yailal jiban.
- 13 Ach ti', c'am jabok chi cha a c'ul yobtakilal, tamwal chi cha a c'ul elon oc co man tojolakok ayon anima on ti'. ¿Tzet wal yuj xin, xan toc'al ok ach tz'injok el bay eb yobtakwom, yak'ban chi lajwi el eb watz'takto wal yuj eb?
- 14 ¿Tzet wal yuj xan lajanxac'al chon ot ayon anima on ti' axcac'al no txay ay bay yul a' mar, axcac'al no no' c'am is yajawilal?
- 15 Axa eb caldeo chi yak' yajawil bay yulak juntzanxa nacionlak axca chi yun eb txaywom yin no txay. Chi mitx'on eb no' yetok anzuelo, c'al yetok txim. Xiwil tzalojc'ulal yet mayal ajtek bulan no'.
- 16 Yuj wal tu', xan a eb txaywom tu', chi oc eb yin ayilal bay is txim, c'al bay is yanzuelo. Chi yak' eb xajanbal c'al yak'on tz'a eb incienso, yuj tx'oxon el eb ayilal. Caw wal chi tzaloj eb yuj ay is lobej watz' yuj is mitx'k'ab tu'.
- 17 ¿Tom axca wal tu' ok yun con is mitx'on eb caldeo yetok is mitx'bal? ¿Tom ok mak'layc'al cam juntzan nación ti' yuj eb, yin tol c'amxac'al yabenc'ulal?

2 1 Axa yayji oc junok taynemal conob yin yopiso, caytu' ok yun in taynen wabej tzet ok yal Cham Yajaw ayin, yet chi nachaj el wuj is paktzebal in k'anlebal bay, quin chi.

Max tak'wi Jehová

- 2 Max paktzej Jehová ayin axca ti': Watz' chot a tz'iben yin junok jenan tx'otx', tzet ok in tx'ox ayach ti', yet watz' a mac chi iloni, chi yi bey jun k'anej ti'.
- 3 A jun tzet yetal lanan elon ti', ayto yajapnok c'ual yuneni; palta yowalil ok yunej. Echbanejc'al, caxc'al ok mayjok, palta ok yunc'alta'a.
- 4 Tz'ibej c'apaxok, tol a eb yobtakwom caw wal tol lues eb; palta eb watz' yul in sat xin, ok ayjokc'al ec' eb, yujtol chin yac'al oc eb yin c'ul, xi Cham.

A bay ok tokcan eb etnewom

- 5 A an vino, chi etnelay eb lues tu' yuj an. Chi maynej aj ba eb. C'am chi oc wanaj eb sayon tzet chi yochej, cax lajan eb axca mukbanil camnak, c'am chi caktzaj aj chaon camnak tu'. Yuj tu' xan chi makbaj el ba eb yin masanil nacionlak.
- 6 Palta a masanil juntzan nación chi ayc'ay tu', ok buchwaj eb yin jun mac chi ak'on ayc'ay eb tu', cax ok buchwajc'al eb axca ti': Ok'bal ach ch'an c'ul ach ti', tol chach oc beyomal yuj tzetak yetal tol man etok. ¿Bak'in ok a bek a wajban ec' bulan masanil tzet yetal cha cha' yuj majanbilal a beyomal? xi mi eb.
- 7 A wal yet man naonok el oj, cax ok apnok oc eb jequelwom ayach, ok aj wan eb ach toj yak'on xiwajok, cax c'amxa janic'ok tzet yetal ok yak'can eb ayach.
- 8 Max ecan ec' is tzet yetal eb anima bay xiwil nación, yuj tu' xan a eb maxto cani, ok yiec' eb a tzet yetal. Caytu' ok ach utlay yuj eb, yujtol xiwil mac max a mak' camok, cax c'am a yabenc'ulal yin anima bay yulyibank'inal, yetokc'al is conoblak.
- 9 Ok'bal ach c'ul ach ti', yujtol max ak' noj atut yuj masanil elk'an, yet ok je' a colon a ba bay tzet yetal ay is may aloni.
- 10 Axca wal tu' max yun eontek q'uixwilal eban yetok a conob. A achc'al oc max etek lowbanil eban, yuj max ak' lajwok el xiwil nación.
- 11 Toltax is ch'enal pared, c'al te patzab, ok aj yaw yin ajc'ulal en.
- 12 Ok'bal ach c'ul ach ti', tol max a tz'unay a conob yuj masanil tzet max e' yin yobtakil chonej, max ach aj can yuj a mak'om cam animail.
- 13 A masanil mulnajil bay max c'unbi juntzan nación max ak' ayc'ay tu', nabac'al, k'ak'ej ok ak'on lajwok masanil tzet max watx'nej eb tu'. Caytu' max yun naon Jehová, Cham Yajaw yin Masanil.
- 14 Tz'akan ok yun yojtacknelay el is mayk'ak'al Jehová yuj eb anima axca chi yun nojil a' mar yuj a' aej.
- 15 Ok'bal c'ul mac chi yak' uc'wok an yet animail yuj yilon is q'uixwiltakil eb. Ok'bal ach c'ul, yujtol a yetok yowal a c'ul max exac'al el q'uixwil juntzan nación ay a cawilal; toxac'al max ec'can k'ek'on eb oj axca uq'uem an.
- 16 Ach ti', manxa ok ach ilay can; palta tol ok il-lay a q'uixwiltakil. A Jehová ok ach ak'on q'uixwanok, axca uq'uem an. Ok ab wal yail yuj Cham, axca wal yailal max aoc yiban juntzan nación tu'. Yuj tu' xan a a maynejbail tu', q'uixwiltakxac'al ok oncan yuj.

- 17 Ach ti', max a k'akay te mimek te' bay Líbano; axa tinani', chach ak'lay lajwok ayok, max a mak' cam no no' bay tu', axa tinani' axa no' ok aon oc xiwc'ulal en. Caytu' ok ach utlay yuj eb, yujtol xiwil mac max a mak' camok, cax c'am a yabenc'ulal yin anima bay yulyibank'inal, yetokc'al is conoblak.
- 18 ¿Tzet yopiso junok comon dios watx'nebil yuj anima? Asan yin on yikban c'aytok. A juntzan tu', c'am chi je' k'anjabí. ¿Tzet yuj xan a jun chi watx'nen tu' chi yaoc yipok c'ul?
- 19 Ok'bal wal c'ul ex tol che yal bay jun yechelej tol te': I el a wayan, quex chi bay te'. Ajan wanok, quex chi bay ch'en ch'en tol c'amc'alta' chi je' k'anjabí. ¿Tom chi je' tx'oxon juntzan tu' junok tzet yetal ayex xin? A juntzan tu', c'am tzet chi je' yuj, yujtol c'am yiquisal, caxc'al tol jopopixac'al yili yuj oro ma yuj plata.
- 20 Axa pax Jehová xin, ayic' bay yul is templo tol asan ay yet. Numayokab satak Cham masanil tzet yetal ay bay sat tx'otx' ti'.

Is txaj cham Habac

3

- 1 A ton wal jun is txaj cham Habac is chekbej Dios ti'.
- 2 A wal yet chi waben masanil tzet max on Mamin, caw chi c'ayxac'al aj in c'ul yuj. Yunokab yul co tiempoal ti', axca tzet max on yet payxa tu'. Tx'ox a miman yabenc'ulal jin, caxc'al nan xol yowal a c'ul.
- 3 Max tit Cham Dios Asanxanej Ocok bay tzalan Parán yul yet Temán. Axa is tzekekial, max toj jopan bay masanil satcan; axa masanil yulyibank'inal max alon watx' k'anej bay Cham.
- 4 Max jay Cham nan xol is jopopial. A yul is k'ab max eltek joplabok rayos; a' max tx'oxon el is yipalil tol c'uan ec' yuj.
- 5 A satak Cham babel yapni oc ilya' tol ayxa is may; axa yet mayal ec'tok Cham, camich max ujcanok.
- 6 Max bilaj tx'otx' tx'otx' ti' yet max oc wanaj Cham. Toxac'al max bilaj nacionlak yuj xiwc'ulal yet max oc t'anan Cham yin. A juntzan witz ayc'alta' yet payxa max pojtok, max uchchajtok masanil juntzan witz tu', a ton bay max ec'c'al Cham yettax yichbanil.
- 7 Max wil wal yoc eb anima aj Cusán yin bilc'ulal, cax toxac'al max xiwaj eb cajan bay Madián.
- 8 Tokwal a yin a' aejlak max tit owal Mamin Jehová. Tokwal a yin a' mar max k'ak'bi tit yowal a c'ul, xan max ach toj yin owal yuj ak'on ayc'ayok, axca tol max ach ajtok yiban chej, c'al yul carruaje yet owal.

- 9 Axca tol max e ajtek a julbal yul tz'umal, max a watx'nej yin a julwaji. Max ak'on jak a' aej be sat tx'otx'!
- 10 Caw wal max bilaj mimek witz yet max a tx'oxon a ba. Max tit mimek owal yaxnab bay satcan, cax max aj yaw a' mar yet chi bilajok. Yak'ban tu', yelxac'al ayxa may max yun yaj wan a' can.
- 11 Axa c'u, yetok xajaw max oc wanajok, yet max el joplabok a julbal, cax max aj joplabok a lanza.
- 12 Yetok yowal a c'ul max a tec'on ay tx'otx' tx'otx'!. A wal yetok a k'ak'alculal max a tec'on ay nacionlak.
- 13 Max ach eltek colwaj yin a conob, c'al yin cham rey sic'bil oj. Max a mak' cam yajawil eb yobtakwom. Max ak' lajwok is conob eb, masantac'al max txecloj aj cimiental yich.
- 14 Ac'al oc yetok is julbal eb yajawil conob max a mak' camok, yet max jay lemnaj eb jin yin on yak'on lajwok eb. Max tzalojxac'al c'ul eb, axca junok chi naon mak'on cam junok meba' anima yin ewantakil.
- 15 Axca tol max a tec'ay a' mar yetok chej, xan xiwil chi bil a' miman a' tu'.
- 16 A yet chi waben masanil juntzan ti', chin xiwajok. Chi bilaj in ti'. Masanil in mimanil c'amxa yip, toxac'al chin telc'ojtok. Caxc'al mi axca tu', palta yin junc'ulalil chi wechbanej jun c'ual yet ok jay yailal yiban eb chi yak' owal jin.
- 17-18 Caw wal ay in tzalojculal yuj Dios in Colomal. Caxc'al c'am chi yak' te higo is xumaquil. Caxc'al c'am chi satni an uva, tamwal te olivo; caxc'al c'am chi satni awoj; caxc'al chi lajwi ay masanil no calnel, c'al no wacax, c'amxa no' yul corral, palta ok in bitnokc'al bay Jehová.
- 19 A Jehová Cham Jajawil chi ak'on wip. Chi yak' yip wakan, yet chi je' in bey axca no tx'ucchej, cax chin yion ajtok can bay chin colchaji.
- Bitnelayokab jun bit ti' ikbabil yuj cham yajawilal eb bitnom, yak'ban chin sonli yetok te son ay tx'anil.***